



20. august 2021

UKA 2021/148

Inatsisartut ingerlatsinermut maleruagassaasa § 33 tunngavigalugu Inatsisartunut ukuningga aaliangiiffigisassatut siunnersuuteqarpunga:

Inatsisartut aaliangiiffigisassaattut siunnersuut Naalakkersuisut peqquneqassasut Naalagaaffiup akisussaasuinut atassuteqartoqarnissaannik Kalaallit Nunaanni Pinerluttulerinermut inatsimmi paragraffimik ikkussisoqassasoq, nittartakkatigut atornerluinerup inatsisitigut unioqqutitsinertut isigineqaarnissaanut. Atassuteqarneq UPA 2022 pinnginnerani pisimassaaq.

(Inatsisartunut ilaasortaq Anna Wangenheim, Demokraatit)

Tunngavilersuut

Piffissami, meeqqagut oqarasuaatinik angallattakkanik, qarasaasianik tigummiartakkanik iPads-inillu angerlarsimaffimmi atuarfinnilu peqarfiusumi, eqqummaariffigissavarput, nittartakkatigut atornerlunneqarsinnaanerit. Imaappoq, meeqqat ukiukittut atortittartutut taaneqarsinnaasumut qanillisarneqarsinnaammata.

Nunarsuup Kitaani, aamma Danmarkimi takusarparput, niviarsiaqqat nukappiaqqallu nukangasut internettikkut atornerlunneqartartut¹. Tamakkua kingunerisimavaat nunat soorlu Sverige aamma Norge nittartakkatigut atornerluinerumut "grooming" paragraffimik aaliangersimasumik pilersitsisimanerat, pinerluttuliornerumut inatsimmi nikkartakkatigut atornerluineq inatsisinik unioqqutitsininngorlugu. Demokraatit isumaqarput, uagut aamma maani Kalaallit Nunaanni piffissaagallartillugu, siusissukkullu iliuuseqarnikkut taamaaliortariaqartugut.

Pissutissaqarluarpugut pinaveersaartinniassallugu, meeqqatta inuusuttattalu ajortumik pineqarnissaat. Kriminalforsorgip 2020-mi nalunaarusaata takutippaa, Kalaallit Nunaanni isertitsisarfinnut pineqaatissinneqarsimasut 36 procentiisa missaat kinguaassiuutitigut innarliisimasutut pineqaatissinneqarsimasut². Taakkunanga 36 procentinit 12 procent meeqqanik 15 inorlugit ukiulinnut innarliisimapput. Inissinneqarsimasut taakku 43 procent missaat Danmarkimi kriminalforsorgip inissiisarfiani piffissaligaanngitsumik inissisimasut, tassaapput inuit inuusuttunut sulii 18-nit inorlugit ukiulinnut kinguaassiuutitigut atornerluisimasut. Meeqqanik inuusuttunillu 18-nit inorlugit ukiulinnik 2020-mi qaammatit qulingiluat ingerlanerinnaanni 213-nit video aqutigalugu killisiorneqarsimapput persuttaanermut kinguaassiuutitigullu atornerluinerumut tunngassuteqartut, ilisimavarpullu ilisimanngisatsinnik atornerlunneqarsimasunik peqartoq, nalunaarutigineqarsimanngisunik. Amiilaarnaqaaq. Killisiuineqarnerani tamani innarliisoqartarpoq, innarlerneqarsimasunik

¹ <https://www.dr.dk/nyheder/politik/partier-vil-stoppe-sugardaddies-med-grooming-paragraf-staar-det-til-os-bliver-det>

² § 37 akissut 158-2020



kingunerlutsitsisunik, ilaquataasut avatangiisaallu eqqorneqartarlutik. Tamassuma takutippaa, qanoq annertutigisumik pinaveersaartitsillutalu pinngitsoortitsiniaassasugut, pinngitsoortitsissagutta.

Aamma ilisimavarput, meerartagut inuusuttagullu amerlasuut angerlarsimaffiup avataanut inissinneqartartut, aammalu meeqqat arlallit taaneqartartutut ”annertuumik pisariaqartitsisut”. Ilisimavarput, meeqqat annertuumik pisariaqartitsisut, meeqqallu innarluutillit, innarlerneqarnissaminnut qaninnerusartut, tassanilu aamma kinguaassiuutitigut innarlerneqarnissamut³. Malunnartoqanngilarlu, taamaaliortarnerup internettikkut allaassuteqarnera.

Sapinngisarput tamaat, meeqqagut innarlerneqarsinnaanerannut illersortariaqarpagut – aamma internettikkut tamannalu angajoqqaat aqussinnaanngisaannik pisarpoq. Digitalimik inuillu attaveqaaqatigiittarfiinik atuinerulernerup takutippaa, tassuunakkut innarlerneqarnissaq qaffakkiartortoq. Meeqqagut inuusuttagullu ulorianartorsiortuaannarput inersimasumit ulorianartumik siunertaqartumik atassuteqarfigineqarnissaminnut.

Demokraatit isumaqarput, annertuumik angajoqqaat akisussaaffigigaat meeqqatik ilinniartissallugit inuit attaveqaaqatigiittarfiinik atuinissaannut, taamatullu isumaqarpugut, atuarfiit tassunga atasumik pingaartumik suliassaqartut. Qanorluunniilli mianersortigigaluaaraanni, digitalikkut atonerlunneqarnissaq pisinnaavoq. Taamaattumik pingaartuuvoq, uagut aaliangiisartutut sapinngisarput tamaat, tamassuma unioqqutitsinertut inissinneqarnissaa.

Taamaattumik Demokraatit inuiaqatigiinni suliassatut pingaartutut isigaat, digitalikkut atonerluinerup pinerlunnertut inissinneqarnissaa paragraffimik pilersitsinikkut, Kalaallit Nunaanni Pinerluttulerinermi inatsimmi inerteqqutinngorlugu.

Taamatut oqaaseqarlunga Naalakkersuisut akissutissaat qilanaaraara aammalu partiit allat ilanngutassaat.

Pisortanut aningaasatigut allaffissornikkullu kingunissai

Naalakkersuisut § 37 apeqqummut normu 054-2021 akissutitut nalunaarutigaa, nittartakkatigut atonerluinermut tunngasumik Pinerluttulerinermut Inatsimmut paragraffimik ilasineq aningaasatigut allaffissornikkullu kinguneqassanngitsoq, Naalagaaffimi oqartussaasut suliassarimmassuk⁴.

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq

Innuttaasunut aningaasatigut allaffissornikkullu kingunissai

Soqanngilaq

³ <https://www.vive.dk/da/udgivelses/boern-med-usynlige-handicap-udsattes-oftere-for-seksuelle-overgreb-og-maa-beskyttes-bedre-15396/>

⁴ https://ina.gl/documents/para3637/2021/svar/054_2021_Grooming_Alliaq_ANWA_rett_svar.pdf